



### **Situaziun da partenza**

La scola superiura a Danis porscha als scolars dil scalem superiur la pusseivladad da luvrar cun MacBookAirs. Quels apparats duein vegnir duvrai per differents aspects d'emprender. Il present contract duei reglar il diever dils apparats ed igl access als mieds electronics ed internet sco era il diever da tals. Il reglament vala da tut temps, ton per il diever en scola sco a casa.

### **Diever dils apparats MacBookAir**

#### **Art. 1 Possess e diever**

Ils airbooks ein possess dalla scola. Els vagnan registrai e marcai da quella. Ultra da quei ei la scola era responsabla per l'administraziun e la configuraziun. Mintga scolar dil scalem superiur retscheiva in MacBookAir marcaus individualmein per luvrar duront il temps ch'el frequenta la scola a Danis. Las datas ch'ei arcunadas sil sistem restan possess dalla scola. Ellas vegnan controlladas e survegladas regularmein. Scolars han absolutamein negin dretg da sfera privata cul diever digl airbook.

#### **Art. 2 Pensums dalla scola**

Ils airbooks vegnan administrai e configurai dalla scola. Plinavon porscha la scola ils backups necessaris. Per quellas lavurs han ils scolars la pusseivladad da colligiar lur airbooks cul sistem dalla scola.

#### **Art. 3 Diever digl apparat (hardware)**

Ils scolars drovan ils MacBookAirs per l'instrucziun. Igl ei scumandau da:

- far midadas vid la hardware,
- metter taccaders ni decoraziuns vid igl apparat,
- brattar igl airbook cun auters conscolars,
- dismetter ni vender il MacBookAir ni informaziuns da quei mied.

#### **Art. 4 Diever digl apparat (software)**

Suandontas funcziuns ein scumandadas:

- aschuntar ni eliminar applicaziuns,
- far in conto dad iTunes,
- midadas da configuraziuns (inclusiv dalla reit),
- sincronisar igl apparat cun in computer ordeifer la scola,
- stizzar il decuors dil browser,
- midar ni deactivar il plaid-clav.

#### **Art. 5 Donns**

5.<sup>1</sup> Suandonts donns vegnan surpri dalla scola:

- donns da garanzia,
- donns caschunai senza cuolpa ni entras accident.

5.<sup>2</sup> Suandonts donns vegnan surpris dils scolars :

- donns caschunai per atgna cuolpa,
- donns caschunai per malprecauziun.

5.<sup>3</sup> La summa dil donn vegn mintgamai fixada dalla firma che procura il support.

### **Art. 6 Enguladetsch**

Sch'in apparat svanescha ei quei dad annunziar immediatamein alla scola. Lezza interpren ils pass necessaris. Las circumstanzas dalla situaziun vegnan inetrcuretgas individualmein. Ei igl apparat svanius ni vegnius engulaus muort malprecauziun, stat il scolar buns pil donn.

Il rapport da polizia ei la premissa per che la scola remplazzi igl apparat gratuitamein.

### **Art. 7 Diever a casa**

Il diever dil MacBookAir a casa ei dependents dils suandonts facturs:

- ils geniturs han priu enconuschientscha dil reglament e lubeschan a lur affon dad era far diever a casa da quei apparat,
- il scolar ha la lubientscha dalla scola da prender igl apparat a casa.

Il diever dil MacBookAir a casa ei gratuits. Il scolar paga sulettamein la tastga speciala da schurmetg.

### **Art. 8 Premissas pil diever dil MacBookAir a casa**

8.<sup>1</sup> Ils geniturs:

- portan la responsabladad pil diever dil MacBookAir a casa,
- han il dretg da mirar ni stizzar ils cuntegns,
- limiteschan il diever digl airbook el temps liber,
- ein responsabels per tut ils donns caschunai vid ils apparats a casa,
- ein responsabels per la filtraziun dil cuntegn ni limitaziuns da temps sill'atgna reit,
- ein responsabels sch'igl apparat «svanescha» ni vegn engulaus.

8.<sup>2</sup> Ils scolars:

- prendan adina il MacBookAir cun el a scola,
- astgan duvrar igl apparat cun autras colligiaziuns da WLAN; la scola porscha denton negin sustegn tecnic,
- tractan hardware e software cun tut quita.

8.<sup>3</sup> La scola:

- segida ed eliminescha eventuels problems. Mintga incap vegn protocollaus; drova in scolar pliras gadas quei sustegn, astga el buca pli prender il MacBookAir a casa.
- ha negina segirada pil diever pils MacBookAirs ordeifer il temps da scola. Donns cun consequenzas finanzialas van a donn e cuost dil scolar, respectivamein dils geniturs. (Mira artechels 5 e 6!)

### **Diever digl internet**

Nus essan dil meini ch'igl internet seigi ina resursa nizeivla e che la scola e scolars dueigien luvrar cun quei mied a moda positiva. Nus essan pertscharts dils prighels ch'il diever digl internet includa, denton ein ils avantatgs per la scolaziun aschi pesonts che l'utilisaziun digl internet duei era formar ina part dall'instrucziun.

Nus savein ch'ei dat buc ina sempla slihaziun tecnica che garantescha ch'ils affons lavuran online a moda segira. Il dretg secuntener sto vegnir emprius ed exercitaus sut survegionza. La scola ed ils scolasts ein pertscharts dalla responsabladad ch'igl access agl internet porta e sorprendan quella cun ina survegionza adequata.

Grondas instituziuns da scolaziun han fatg l'experiencia ch'il diever memia restrictiv pertuc-cont filtraziuns d'internet tier affons e giuvenils fa buca pli segira la situaziun, damai ch'ella pren naven la responsabladad ch'ils affons ston emprender cul diever da novas tecnologias. Perquei integrein nus l'utilisaziun da novas medias en nies mintgadi, setenend denton vid reglas claras e fermas. A quellas appartegnan:

- ina tenuta clara e transparenta ed in diever acceptabel che vegnan defini en in contract, il qual vegn suttascrats da geniturs e scolars,
- diever survegilau,
- consequenzas da protecziun tecnicas,
- consequenzas disciplinaras en cass da surpassaments enviars il contract.

Nus lein tuts (scolasts, responsabel per tic, menader da scola, scolaras e scolars) far tut il pusseivel per garantir in diever digl internet aschi segir sco pusseivel.

### **Art. 9 Access alla reit**

Scolars astgan duvrar mo la reit ufficiala da WLAN dalla scola. Il plaid-clav vegn indicaus ed arcunaus el zuppau dalla persona d'instrucziun. Duess il plaid-clav vegnir alla glisch, sto il scolast responsabel vegnir informaus ed il plaid-clav midaus. Access alternativs (via telefonins ni autras reits) san buca vegnir controllai ed ein perquei scumandai.

### **Art. 10 Reglas pil diever dalla reit**

Per tut ils utilisaders dalla scola vala:

- Adressas dad e-mail duein ins dar mo a personas da confidanza,
- mintga adressa dad e-mail dad ina fontauna nunenconuschenta sto vegnir annunziada,
- vegnan cuntegns zuppai, obscens, permalonts ni schiglioc cuntegns inacceptabels scuvretgs, ston quels immediatamein vegnir communicai al responsabel dalla reit,
- adressas ni numras da telefon audan buca ella reit, ni las atgnas, ni da conscolaras e conscolars, ni da personas d'instrucziun,
- vegnan fotografias ni videos cargai silla reit, astgan ils scolars buca esser numnai cugl entir num ed aschia restar anonims schi lunsch sco pusseivel,
- mintga access vegn survegilaus: datas, decuors dil browser ein accessibels da tut temps alla scola ed astgan buca vegnir stizzai.

### **Art. 11 Diever acceptau e lubiu**

Scolars e geniturs san duvrar la reit dalla scola per intents pedagogics. Quels ein defini suandontamein:

- instrucziun,
- retschercas,
- formaziun cuntinuada el sectur scolaziun,
- administraziun.

Tut las lavurs che stattan en connex cun emprender, derasar savida ed augmentar las atgnas cumpetenzas ein giavischadas e lubidas.

## **Art. 12 Diever scumandau**

Igl ei scumandau strictamein da:

- dar vinavon il plaid digl utilisader ed il plaid-clav,
- crear e dar vinavon maletgs e datas cun cuntegn permalont, obscen e scandalus,
- crear e dar vinavon material cull'intenziun da derasar tema ni currellas,
- crear e dar vinavon material cugl intent da cuglienar,
- crear e dar vinavon material che sa far donn a persunas,
- adattar e dar vinavon material ch'ei schurmegiaus entras dretg d'autur (copyright),
- crear e dar vinavon material da marketing ni da massas per utilisaders ordeifer la scola (Spam),
- dar access a persunas buc autorisadas sin installaziuns ni purschidas (hackers).

Medemamein ein activitads specificas che han cun gronda probabladad las suandontas consequenzas scumandadas:

- sfarlatar resursas dalla reit e temps da lavur da persunas d'instrucziun ni d'emploiai pigl internet,
- donnegiar e demolir datas dad auters utilisaders,
- violar la sfera privata dad auters utilisaders,
- disturbar la lavur dad auters utilisaders,
- bloccar il survetsch per auters utilisaders (p.ex. cun surcargar igl accesssenza risguard (sitecrashing),
- diever da software e hardware che ha procurau per disturbis ed ei perquei sclaus dalla scola,
- maldiever dalla reit da scola ni resursas da quella entras derasaziun da virus e malware,
- diever dalla reit da scola per donnegiar e devastar autras reits.

## **Art. 13 Activitads sut survegionza**

Suandontas applicaziuns (apps) ed activitads astgan vegnir exequidas mo sut survegionza e cun lubientscha dil scolast:

- il diever da chat e newsgroups astgan vegnir duvrai mo cun lubientscha dil scolast per in pensum specific,
- il scolast sa era scumandar da scargar cert material,
- il scolast ei responsabels ch'il metrial cunterfetschi buc al dretg d'autur,
- plattas externas, DC e DVDs,

Agens downloads da scolars ein scumandai.

## **Art. 14 Segirtad en la reit**

Per francar ch'ils scolars semovien en parts adequatas digl internet e ch'els seigien buca exponi al prighel da cyber

- san ils scolasts far emprovas e controllar da tut temps il decuors dil browser e dil cuntegn dils MacBookAirs,
- astga il decuors dil browser (e cheutras l'eliminaziun dils fastitgs) mai vegnir stizzaus,
- suttascrivan ils geniturs in contract davart il diever acceptabel dils airbooks.

## **Art. 15 Pensum dils geniturs**

Ordeifer la scola ein ils geniturs responsabels che lur affons semovien a moda segira egl internet. La scola sa bein informar davart rescas pusseivlas, denton support pigl internet a casa sa ella buca porscher. Ils geniturs san s'informar tier ils scolasts, sch'els gavischan dapli

informaziun davart protecziun tecnica pli segira, litteratura ed auter. Informaziuns detagliadas ein d'anflar sut: <http://www.safersurfing.ch>

#### **Art. 16 Diever da cameras**

Il diever da cameras ha liug mo cun lubientscha e sut survegionza dil scolast. Igl ei scumandau strictamein da fotografar ni filmar conscolaras e conscolars en zulers e sin plaz scola e cargar il material silla reit.

#### **Art. 17 Consequenzas disciplinaras**

Surpassaments encunter ils artechels numnai en quei reglament vegnan castigai rigurusement tenor il manaschament da conflicts dalla scola.

Ultra da quei san las consequenzas disciplinaras includer ils suandonts pass:

- scamond da duvrar il MacBookAir ordeifer la scola,
- restricziuns da duvrar il MacBookAir en scola,
- scamond da luvrar cun il MacBookAirs,
- negin access agl internet,
- grevs surpassaments tenor artechel 11 san vegnir annunziai alla polizia.

#### **Art. 17 Vigur**

Quei reglament entra en vigur cun l'entschatta digl onn da scola 2014/2015.

Approbau dil cussegl da scola en seduta dils 16 da settember 2014.

Breil, ils 28 d'october 2014

*La presidenta*

*Il menader da scola*

*Daniela Seiler*

*Michael Friberg*

---